

今
泰
中

貴陽唐光祖書

光緒丁亥歲余由河南羅山縣任奉諱返里戊子家居守制恒杜門不出念生平多未讀之書欲趁閒屠力爲搜考陳君衡山余舊友也伯兄崑山仲兄崧山與余皆極投契往歲書齋課業時過往迄無虛日稔知其家藏書甚富今崑山以名進士出守滇南崧山方入館選獨衡山於余旋里時適自滇歸余深幸觀書得便時從相假流覽陳編之外衡山又以新刻各種見示如黔記黔詩等類皆足以補吾黔志乘之闕竊歎衡山之留心桑梓爲不可及矣檢書篋中尙存黔史鈔本一部未及校刊將作海外之行舉以屬余余實不敏何克當此重任然念里居多暇正可以筆墨爲消遣計况其爲闕前人編輯之苦心備吾黔參考之掌故安可不繼衡山而襄厥任也遂攜以歸竭二十餘晝

黔史熊叙

夜之力訂訛正謬不敢謂纖毫無遺或不至爲鈔胥所誤間猶有所待正者標出頂格以俟博雅君子重加釐訂余不敢強副解人也至此書之要旨與夫著書者之姓氏淵源悉詳衡山後跋中余不復贅云光緒十四年歲次戊子仲春月下浣貴陽熊湛英叙

黔史

周秦漢唐迄五代一帙

雍川猶法賢編

貴陽熊湛英校刊

周赧王三十有五年為秦昭襄二十有七年秦取楚巫黔中地

按史記秦昭襄三年因蜀攻楚黔中拔之又三十年蜀守若伐

取巫郡及江南為黔中郡與此年代異

按楚頃襄立於赧王之十六年當秦昭之八年

距秦取地十九年則後漢書似確有據

秦置黔中郡

通志云禹貢荆梁二州南

鄙周為靡莫之屬成王合梁於雍又為雍州之南裔春秋時楚

莊既霸遂服於楚為巫黔中地舊志云秦置黔中郡治在楚今

常德府自辰沅寶靖至黔思播弁州西陽石柱等司皆其屬隸

楚永樂十六年湖廣布政使蔣廷瓚建議始分署貴州漢置武

黔史卷一

陵郡即秦黔中郡又云川之西陽司地置武陵郡考之廣輿記

其治自辰沅上至黔思石銅黎等較黔中郡所轄地似有其半

按秦初因蜀拔取巫黔中當在夔府下及楚宜昌施南等尙未

治常德也漢改武陵郡或即今之常德為近

楚人遣將循沅水伐夜郎

凡言遣者不當遣也

軍至且蘭楸船於岸而步

戰遂滅夜郎以且蘭有楸船牂柯處乃改其名為牂柯

前漢書云楚威

王後漢書云楚頃襄王前書云遣將莊躡後書云莊豪未知孰是

漢改黔中郡為武陵郡

按通志以改置武陵郡為高帝四年殊謬當是時楚漢爭戰滎陽京索間何暇

及此即想當然亦當在六年偽遊雲夢時或征淮南英布時

武帝建元六年遣唐蒙通夜郎發巴蜀卒治道自犍道指牂柯

江蒙多誅其渠率巴蜀民大驚恐上聞之乃遣司馬相如責蒙

等因諭告巴蜀民以非上意相如還報蒙已略通夜郎因通西南夷道發巴蜀廣漢卒作者數萬人治道二歲道不成士卒多物故費以億萬計蜀民及漢用事者多言其不便是時邛笮君長聞南戶與漢通得賞賜多多欲願為內臣妾請東比南戶上問相如相如對曰邛笮冉駹者近蜀道易通異時常通為郡縣矣至漢興而罷今誠復通為置縣愈於南戶上以為然迺拜相如為中郎將建節往略定西南戶邛笮冉駹斯榆君長皆請為臣妾除邊關益斥西至沫若水南戶牂柯為檄通靈山道橋孫水以通邛笮還報天子大悅相如傳元鼎六年平且蘭遂平南戶置牂柯郡按華陽國志與此年代不符先是元鼎五年秋南粵反叛叛者背此附彼之謂反則其勢大合境騷動為大逆之名故他處慎言之上使越馳義侯遣別將巴蜀罪人

黔史卷一

二

發夜郎兵下牂柯江咸會番禺且蘭長恐遠行旁國虜其老弱乃與其眾反殺使者及犍為太守漢乃發常擊南粵者八校尉擊之會越已破漢八校尉不下中郎將郭昌衛廣引兵還行誅隔滇道者且蘭斬首數萬遂平南戶為牂柯郡夜郎始倚南粵南粵已滅還誅反者遂入朝上以為夜郎侯漢書

成帝河平二年冬十有一月夜郎長歆與鈞町長禹漏卧長俞舉兵相攻遣大中大夫張匡持節和解不從迺以金城司馬陳立為牂柯守招諭歆歆不從丁巳立捕殺歆眾皆降

光武建武二十有四年命新息侯馬援討五溪蠻失利此言命將討不

庭也

先是武威將軍劉尚擊武陵五溪蠻

水經注五溪謂雄溪楠溪西溪辰溪瀟溪即鎮

遠深入軍沒援請行帝以援老未許援據鞍顧盼以示可用
帝曰矍鑠哉是翁也遂遣援率中郎將馬武耿舒等將十二
郡募士及弛刑四萬餘人征之軍至臨鄉縣名屬武陵郡擊破賊皆
走入竹林中初軍次下雋縣名沅陵屬辰州有兩道可入從壺頭山名
屬辰州則路近而水險從充縣名沅陵屬辰州則塗夷而運遠帝初以
爲疑及軍至耿舒欲從充道援以爲弃日費糧不如進壺頭
搃其吭充賊自破以事上之帝從援策三月進營壺頭賊乘
高守隘水疾船不得上會暑甚士卒多疫死援亦中病遂困
乃穿岸爲室以避炎暑武陵記云壺頭山邊有石窟賊每升
險鼓譟援輒曳履觀之左右哀其壯志舒與兄弇書曰前舒
上書當先擊充糧運雖遠而兵馬得用軍人爭欲先奮今壺

黔史卷一

三

頭竟不得進大眾怫鬱行死誠可痛惜前到臨鄉賊無故自
致若夜擊之即可殄滅伏波類西域賈胡到一處輒止以是
失利今果疫疾皆如舒言弇得書奏之帝乃使虎賁中郎將
梁松乘傳責問援因代監軍會援病卒松曩謁援拜牀下援
以父執不爲禮松宿懷不平因事陷之帝大怒追收新息侯
印綬初援征交趾常服薏苡仁以消瘴南方薏仁實大援欲
以爲種軍還載之一車人疑爲南海珍寶權貴皆垂羨時上
方寵援故莫敢問及卒有上書讒之者馬武與侯昱亦以章
言其狀帝益怒援妻孥惶恐不敢以喪歸舊塋裁買城西數
畝藁葬而已

安帝永初元年夜郎侯舉土內屬拓境千八百四十里

後漢書

靈帝熹平三年牂柯饑

蜀漢建興元年夏牂柯守朱褒叛應雍闓 三年丞相亮南征

夜郎長濟濟火迎降先驅所至克捷 延熙十有一年涪陵國

人殺都尉叛車騎將軍鄧芝討平之 晉志涪陵郡夷思播黔費

陵見黑猿緣山芝性好弩手自射猿中之猿拔其箭卷木葉塞

其射芝曰嘻吾違物之性其將死矣或曰芝見猿抱子樹上引

塞其射芝乃嘆息投弩水中自知當死 晉永嘉二年分牂柯立夜郎郡領夜郎四縣 永昌三年尹奉

為寧州刺史募檄外夷刺殺爨亮降李暹 寧康元年冬十一

月苻堅克梁益二州邛笮夜郎皆附於秦堅敗復於晉

周保定二年蠻獠叛遣開府陸騰討平之 按本傳騰開道得古

道

黔史卷一

隋大業七年置綏陽縣按蜀漢復荆州武陵諸郡皆隸焉後荆

州屬吳而牂柯乃屬蜀漢之益州及晉平吳荆州郡縣屢有分

析而武陵諸郡常屬荆州晉泰始七年置南寧州統郡八牂柯

屬焉旋廢自後沿革多無可考

唐太宗貞觀元年以牂柯北界地置朗州並置縣六曰恭水高

山貢山邪施柯盈釋鷲十一年廢十三年復置州更其名為播

更恭水為羅蒙又更為遵義府 府之名 更高山為舍月柯盈為

帶水釋鷲為胡刀元至元廿八年置平月長官司明洪武十四

年置平越衛 靖果園云遵義府所轄多唐珍州溱州地所得播

苦無載籍可証耳愚按舊志以平越為朗州朗州改名播州是

播州之名先得於平越後移於遵義至宋大觀二年楊文貴納

土置播州端平三年復以白綿堡置播州皆非今遵義府治

珍州溱州境土遞相沿革故耳惟置遵義軍則今府治地後置

四年改務州為思州

先是以隋巴東郡之務州扶陽置務州至是改焉

此思州當在婺川

尋以涪川扶陽兼開南蠻置費州

八年以多田城樂二縣隸費州以高富隸黔州

即今思南

十六年

開山洞置溱州領縣五曰夜郎樂源

即今黃平舊州城

榮懿扶歡麗皋

即餘慶縣旋廢

又開山洞置珍州元和三年州廢

長安四年析

沅州夜郎渭溪置舞州

元宗開元二十有一年置黔中採訪使治黔州

代宗大曆四年夏六月辛亥升辰州為都督府析沅巫辰溪錦業等州置團練觀察使

黔史卷一

五年冬十二月乙未改巫州為叙州業州為獎州

即鎮遠

領縣三

曰峩山

即鎮遠縣

渭溪梓薑

今施秉西北四十里有梓薑關疑即古梓薑縣也

初開元十三年更舞州為鶴州以舞與武同音二十年又改

鶴為業至是又改業為獎開元二十有六年廢胡刀瑯川二

縣併入帶水

在今餘慶縣江外十字路俗名偏刀水

十年春正月丙寅罷辰錦溪淑獎五州經略使復隸黔中

舊志以餘慶為費州安化為思王婺川為都濡印江為思印

石阡為夷州桐梓為珍州綏陽為洋川思州為務州思南為

黔州又按通志以費州為思南溱州為桐梓珍州為正安州

錦州為銅仁叙州為黎平盤州為南籠稱名互異前後年分

多舛文獻不足闕疑可也按以餘慶為費州又以為思南非

也費州距今思南府治東北百里不知何所思南本唐貞觀三年以南謝蠻首領謝疆地置莊州四年改名黔州宋爲思州通志謂有兩思州非也二田分據思州地以其南爲思南也又云溱州爲桐梓者非也溱州距桐梓二百里距播州治北二十五里不知何所至云溱州所屬之扶歡縣在桐梓扶歡山下者近是按榮懿扶歡二砦本楊光吉所據地隸涪州南川又云珍州爲桐梓又以爲正安州亦非也珍州距正安南四十里遺址猶存卽古播州亦非今郡治相傳白綿堡者近是大抵唐貞觀以後以今之平越隸播州以今之遵義分隸珍州溱州至大觀端平年間置播州乃屬遵義然貴州自明萬厯以前未入版圖諸郡縣特遙置名目非砌築城垣實

黔史卷一

六

指所在如內地於今無疑也然必以正史爲斷

德宗貞元四年冬十月經略韋臯聞吐蕃將寇西川遺書敘述雲南歸化之誠按遺書當係遺書吐蕃也始相疑貳遣兵屯會川以塞其趨

蜀之路要大臣子弟爲質雲南益怒歸志愈堅吐蕃兵勢始弱按南詔諸蠻古西南奧區與川之巂敘黔之思播邛笮相連屬雲南入蜀路有二一由金沙江一由黔之大方畢節赤水而黔路較平坦雲南西與吐蕃接以兵阻之則路絕至是蜀與雲南合路通則吐蕃不能寇西川矣

五年冬十月丙午韋臯與東蠻合力破吐蕃擒其將臧遮吐蕃挫銳八年春二月壬寅雲南路絕復通十一年春正月乙亥黔中經略王錡爲廣州刺史嶺南節度王礎代之九月丁

已加韋臯統押諸蠻及山西八國雲南安撫使 十二年春正月乙丑加韋臯渾瑊等同平章事悉授天下方鎮以悅其意 二十年冬十二月吐蕃南詔日本國遣使來

憲宗元和二年詔思費夷播溱錦叙蔣八州皆隸黔中採訪使 八年牂柯國請內附

文宗開成三年牂柯蠻寇涪州清溪鎮兵擊却之

武宗會昌元年春三月黔南大風飄瓦 六年春正月己未南詔牂柯昆明等國遣使來

宣宗大中六年閏六月庚子遣使徧詣塞下召酋長諭以禍福 邊境悉安

懿宗咸通元年南詔豐祐卒朝議因其不常擾邊子名酋龍音

黔史卷一

七

近元宗廟號停其冊禮酋龍遂自稱皇帝國號大禮改元建極 遣兵攻陷播州 十月安南都護李鄴復取播州 十一月南詔引兵攻陷交趾鄴與監軍俱奔舞州 二年冬十月遣神策將軍康承訓率禁軍及江西湖南兵至安南蠻遁去 四年夏四月南詔寇左右江逼邕州

承訓至邕蠻寇益熾詔發許滑青汴兗鄆宣潤八州兵赴援 踰月與戰俱沒惟鄆兵後至其小校夜縋城出率勇士燒營 斬蠻首五百大驚解去承訓追之殺掠甚眾奏捷中外皆賀 加承訓檢校左僕射其餘子弟皆受賞燒營將校反不加恩 軍中皆怨

十四年五月南詔連寇西川黔南黔中經略使秦匡謀棄城奔

詔斬匡謀籍其家

僖宗乾符二年春正月丙戌轉高駢西川節度使修邛峽關諸城柵又築馬湖鎮號平彝軍控蠻要路自是稍不敢入 五年四月南詔因駢來請和親禮部侍郎崔澹議駢不識大體傳笑後代盧攜欲與之鄭畋固爭不可遂致相詬上怒曰何以儀型四方 先是德宗建中三年牂柯酋長來大酋長檢校蠻州長史資陽郡公宋鼎與諸謝請朝德宗以其國小不許訴於黔中經畧王礎以州接牂柯願隨牂柯來礎奏牂蠻二州戶繁力强爲鄰藩所憚請許三年一來從之至昭宗乾寧三年黔南觀察使王肇以其地降於王建牂柯諸州不通中國蠻酋分據其地自置爲刺史

黔史卷一

按是時主德昏庸紀綱紊亂兵戈滿地民不獲耕愁苦之聲無處無之而四夷亦併起侵寇以窺中原至有以和親之議請於朝殊可笑也

五代後唐莊宗同光三年蜀王衍降得蠻地六十四州 明宗天成二年八月乙酉牂柯使宋朝化及昆明等一百五十人來至孟知祥據蜀復不通

石晉天福五年牂柯張萬濬率巨播等七州皆附於楚馬希範先是溪州刺史彭士然率錦獎諸蠻攻澧州希範遣將劉勅劉全明等以步卒五千擊之士然大敗勅等遂攻溪州士然走蔣州遣其子師嵩率諸蠻酋降於勅溪州西接牂柯南寧南通桂林象郡希範乃立銅柱爲表命學士李皋銘之於是

南寧州酋長莫彥殊率其本部十八州都雲酋長尹懷昌率
其昆明等十二部牂柯張萬濬率其夷播等七州皆附於希
範

雍川猶法賢編

貴陽熊湛英校刊

宋太祖乾德元年春洞谿番長納款輸誠

太祖既下荆湖思得通蠻情有辰州獠人秦再雄者武健多謀為諸蠻所服太祖擢為刺史厚恤之仍使自辟吏屬予一州租稅再雄感激選親校二十人分使九谿一十八洞及巫淑誠獎等州傳朝廷懷遠之意莫不風從各得降表以聞再雄盡瘁邊圉六州連袤數千里不煩一兵不費一帑終太祖之世邊境無患

二年夏四月溪淑獎等州民相攻劫遣殿直牛允齋詔諭之乃

黔史卷二

十

定此言遣者不得不遣也難之之詞州長田處達來

秋播州田禾一莖兩穗 開寶九年獎

太宗太平興國元年番部長楊通蘊來進寶玉文馬珊瑚樹詔授通蘊為徽州刺史 雍熙二年龍漢濬自稱權南寧州番落使遣牂柯諸州酋長來貢方物名馬並上蜀孟所給符印詔即真以其長為懷化司戈 端拱二年漢濬傳牘五溪酋約入貢 宋史有龍番方番石番羅番張番五姓又有韋番程番比附號七番元史又以大小龍番卧龍番洪番盧番合方番程番石番謂之八番皆常奉貢受爵

詔限貢

按宋史淳化咸平之間溪洞土司率其部落以方物良馬入

貢者絡繹萬里外往返艱辛以朝廷賞賜過厚又觀瞻所在苗民極爲欣羨故也咸平年間封蠻部一百三十人爲官皇祐年間封蠻部首領九十三人爲郎將治平年間封至二百四十一人爲部將其長爲寧遠將軍兼刺史武寧將軍兼刺史其金幣之厚又無論已貢使人數之多每歲至七八百人甚至千百餘人元豐以後有詔限五歲聽一貢人有定數無輒增加及別立首領以息公私之擾命宋敏求編次諸國貢奉錄客省四方館饌儀皆著爲式於是溪洞貢事稍衰焉仁宗嘉祐二年楊通蘊弟通寶繼行入貢龜筒犀角蜀馬稱誠州刺史通寶美姿容通文學善辭令朝廷嘉賞之詔授誠州刺史

黔史卷二

十一

五代以來諸楊專洞溪受命爲刺史自通蘊始

五年獎淑播錦費等州來

神宗熙寧五年秋七月遣章惇察荆湖北路北江彭氏南江舒氏並思州田氏向氏皆隸辰州入貢受朝命開梅山置安化縣剗城砦六年五月播州楊貴遣子光震來貢命爲三班奉職七年指揮使楊正棠將兵平苗留守施秉橫坡八年春三月戊戌從知河州鮮于師中奏置番學校番子弟賜田十頃歲給錢千緡增解進士二人九年春正月己卯章惇招降五溪

蠻五溪皆平

綱目

元豐八年辰州江外生蠻願輸租內附不許

此湖廣轉運使言也自是五溪郡縣置而不問

徽宗大觀二年六月瀘南夸任應舉納土復建珍州渝州蠻趙秦等內附建漆州 三年二月丙子朔播州楊文貴納土即其地置遵義軍 政和三年十二月築漆播等八州城 七年番部長田祐恭內附置思州

五代以來諸洞驕恣獨思州田氏奉法醕謹保安番部屢賜璽書褒之且代產異才宋興輸金佐命乾德三年親行入貢太祖知名甚嘉賞賜亦厚世為思州守號思州大田鎮遠府轄亦大田溪洞地也

宣和四年廢思州

高宗建炎二年調思州田氏討劇賊王闢 紹興元年復置思

州 按此思州當屬思南思南本古大姓謝疆所據地唐貞觀三年置莊州四年改名黔州不知何時又為田氏有通志謂田

黔史卷二

氏祖克昌涉巴峽卜築思州然何由據其地至唐之思州本今婺川至元十四年置思州宣撫司治龍泉坪因龍泉火徙治都坪即今思州府也至正二十二年田茂安始分據其地降於明玉珍置思南都元帥府即今思南府也舊志謂有兩思州之疑以此又開元以後只言費州不言黔州志無明文不敢臆度

六年詔沿邊溪洞諸州置弓弩手

知鼎州張覺言澧辰沅靖溪洞接壤祖宗時常置弓弩手得其死力比緣多故遂皆廢缺詔荆湖北路帥師以聞帥師言當四川舊制弓弩手九千一百一十人分處要害量給田土訓練以時耕戰合度庶可備禦詔從之

孝宗乾道六年盧揚西口獠陽添朝寇邊孫叔傑攻之敗績

初獠人與省戶交爭殺一人孫叔傑輒出兵破其十三棚奪其所侵地於是獠人相結為亂諸司請調武陵兵益守兵三

于合擊討之宰臣虞允文奏曰蠻夷爲變皆守臣貪功所致
今徭人仇殺守臣若更叔傑量遣官軍示以兵威徐與盟誓
自可平定帝可其奏命葉行代叔傑開示忠信諭以禍福遂
招降之邊境乃平

寧宗嘉泰元年土官宋永高平麥新以其子宋勝守之改麥新

爲新添

新添之名始此

開禧三年冬十月乙卯復珍州遵義軍 五

年秋九月庚戌遵義砦夸楊煥來貢馬 嘉定六年秋八月庚

午思州田宗範作亂夔州路安撫司遣兵擊平之

理宗淳祐三年二月余玠爲四川制置使能養士播州冉璉及
弟璞居門下數月無所言玠疑之使人窺其館對踞以堊畫地
爲山川城池之形因請見玠屏人曰某弟兄辱明公禮遇無稍

黔史卷二

三

裨益爲今日西蜀之計其在徙合州城乎玠不覺躍起執其手
曰此玠志也但未得其所耳璉曰蜀口形勝之地莫若釣魚山
請徙諸此若任得其人積粟以守之賢於十萬師遠矣玠大喜
曰玠固疑先生非淺士先生之謀玠不敢掠遂密聞於朝詔權
通判合州徙城之事悉以任之釣魚城成蜀始可守昔人謂番
之有才爲播良然

四年夏五月丁巳詔雄威軍都統楊价連年調戍有功特轉右
武大夫 寶祐二年秋七月詔加恩思播二州守臣田應庚楊
文

四年夏五月甲辰詔思播結羅鬼爲援

羅氏遣報元兵屯大理國取道西南將大入寇詔發銀萬兩

使思播結援故有是命

五年夏四月己卯元兵破苦竹隘守將楊立張實戰死閏月己

酉詔築思州三隘

在鎮遠偏橋地禦元兵也

十一月乙亥詔荆湖帥臣分

置黃平清浪平溪屯戍

六年春正月甲戌出封椿庫銀命呂

逢年相度黃平思播諸險要趣辦屯柵

夏四月丁酉擢田應

己御前忠勝軍副都統制駐思州築播州關隘

冬十一月甲

寅築黃平賜名鎮遠州

鎮遠之名始此

度宗咸淳二年夏六月丁丑給羅鬼國化州印

帝熈德祐元年春正月加知播州楊邦憲知思州田謹賢并團

練使尋加觀察使趣兵入衛

元世祖至元十有四年春宋人大去其國

即宋王帝昞景炎元年

思州

黔史卷二

十四

長田景賢播州楊邦憲相繼送欵俱授安撫司置鎮遠沿邊溪

洞招討使尋立軍民總管府以田氏為總管聽順元路宣慰司

節制

十有五年秋七月壬午朔宋湖南制置使張烈良提刑劉應龍

及元軍戰死之

書死之與其不屈於元也

烈良率所部周隆賀十二起兵行省調兵往討執周隆賀十

二烈良舉家及兵奔思州烏羅洞為元軍所襲二人皆戰死

冬十有一月丁亥辰沅靖鎮遠等郡蠻獠接壤民居詔塔海程

鵬飛分監湖北道宣慰使置司常德路

十六年春三月甲戌

授八番龍文求為卧龍番龍延三為大龍番龍方霖為小龍番

俱安撫司得洞寨一千六百二十六所

冬閏十一月庚戌羅

施鬼國阿榨內附立羅甸軍民安撫司 十二月丙申楊邦憲請以鼎山縣隸播州尋改爲播川縣

十有七年春三月甲辰思播軍侵鎮遠黃平界即今偏橋命李德輝往視之

德輝通州潞縣人西南夷叛德輝以左丞被命至播遣張李思諭鬼國趣降其長阿察熟德輝名曰是活合州李公耶其言可信即自至播州泣直告曰吾屬百萬人微公來死且不降今得所歸蔑有二矣德輝上聞乃改鬼國爲順元路以其長爲宣撫使司有以德輝受賂譖於朝者帝曰是人朕素知一羊不受寧有是耶德輝還至黃平夜星貫如斗嘆曰吾嘗夢至烏江今播水名烏江適遇星貫吾死徵矣吾嘗奇曹武

黔史卷二

五

惠爲將不殺今所活者多馬革裹尸歸何恨病七日卒諡忠宣

冬十有二月羅施鬼國土寇爲患思播道路不通發兵千人開道 戊子詔發也可不辭軍千五百人復還塔海戍八番羅甸

十有九年春二月壬子詔僉亦奚不辭及思播淑三州軍伐緬國也可不辭亦奚不辭俱羅氏別部二十年夏六月辛亥四川行省參政

曲立志思討平九溪一十八洞定其地設州縣置貴州等處長官司領於順元路安撫司靖果園云貴州之名始此然讀五代史周太祖事漢鎮天雄軍時世宗領貴州刺史天雄軍牙內都指揮使貴州之名其來似舊二十有一年改思播二州隸順

元路 夏四月壬寅發思播二家軍從伐緬 二十六年十一月丁巳改播州爲播南路 二十有八年六月丁卯朔立黃平

元帥府隸播州 冬十月中書省臣言溪洞歲進馬五十匹兩
毡五十被刀五十握丹砂雄雌黃等物率二歲一上詔從其所
為 十一月乙卯新添葛蠻洞官阿汾青貴來貢立葛蠻軍民
安撫司 二十有九年改思播二州隸湖廣省 改烏蒙爛土
軍民安撫隸八番都元帥以土人爲使 金筑蠻長貢馬雨氈
桑州生苗羅甸國古州等峒苗來降 十一月丙戌提省溪
錦州銅人諸洞渠長楊秀朝木忽魯甸土官阿魯等來 三十
年夏五月括思播等處亡宋涅手軍 冬十二月遣使督思播
二州及鎮遠黃平宋舊軍八千人從伐安南
成宗大德三年春二月立烏蒙烏撒等郡置維摩州 五年雲
南土官宋隆濟叛水西土官之妻蛇節以其眾應攻貴州知州

黔史卷二

六

張懷德戰死蛇節恨行省右丞劉深脅供餽三千金馬三千匹
故以兵應 六年冬升普定府爲路以故知府容苴妻爲總管
滇志云容苴効順既沒其妻能宣力戎行故有是命

八年宣撫宋阿重擒隆濟斬之蛇節降并殺蛇節

武宗至大元年夏六月丁酉烏蒙烏撒地大震凡三日夜 秋八月

己卯平伐蠻長不老丁遣使來降卽其地立安撫司

仁宗延祐元年夏五月思州饑賑之 五年冬十月播州南寧

長官洛麼作亂思州守臣換住歌招諭之洛麼遣人以方物來

泰定帝泰定元年春鎮遠饑 秋七月思州平茶酉陽二司賊

寇小石耶凱江等寨調兵捕之 平茶賊楊大車也 酉陽賊冉世昌也 思州洞長

楊銀干來 八番生蠻韋光正等及楊黃五種來降俱授長官

司 番播大旱疫 三年春三月番長表願輸布二千五百疋
設番部官鎮撫之 夏六月癸酉播州黎平愛合謝烏窮爲寇
宣慰楊燕里不花招平愛出降烏窮不附命湖廣行省討之已
而燕里不花反引四川賊囊加台至烏江加台分兵寇襄陽歸
州月魯帖木兒及參政孛羅奉詔至四川招諭之 十一月播
州蠻宋王保來 四年冬十一月庚子授思州土官田仁爲宣
慰使播州謝烏窮爲長官司

文宗至順元年雲南諸王禿堅及萬戶伯忽等叛調八番元帥
完澤及宣慰阿畫爲滇省左丞從豫王阿剌忒納失里等討之
四月蠻酋祿余殺烏撒宣慰官吏降於伯忽羅羅諸蠻俱叛與
伯忽應詔卽遣豫王亟會兵分道剿平之擒伯忽等斬於市眾

黔史卷二

十七

潰散至三年祿余亦降 二年夏五月丙申八番西蠻官阿馬
路來貢 秋九月思州鎮遠饑賑之 發米五百石

順帝至元元年春三月癸未貴州平伐都勻定雲蠻長寶郎天
都蟲等來降卽其地立宣撫司授之 十二月壬戌詔四川雲
南保舉蠻部官以俟銓注 割湖廣元領新化古州潭溪龍里
洪州諸洞苗民戶隸靖州 至正二年秋九月復谿洞堡寨二
百餘處 六年七月散毛洞蠻覃全在叛招降之立散毛軍民
宣撫司

二十有二年鎮遠土知府田茂安降於僞夏

僞夏明玉珍也玉珍初爲紅巾賊黨倪文俊已而據成都自
稱蜀隴王國號夏置思南道都元帥府 卽今思南府治 遣指揮李芝

麻帥兵由八番分陷雲南
是時貴州屬玉珍按舊志云土知府通志云知州然考洪武五年降
鎮遠府為州
則舊志為是

黔史卷二

雍川猶法賢 編

貴陽熊湛英校刊

明太祖洪武元年春正月征偽漢畧地湖南思南宣慰田仁智來歸 思州宣撫司田仁厚來獻地

仁智遣都事楊琛歸附并納元所授宣慰詔帝以率先來歸大悅俾仍為思南道宣慰使以三品銀印給之授琛為宣撫司未幾思州宣撫田仁厚亦遣都事林憲萬戶張思溫來獻鎮遠古州軍民二府婺川邛水常甯等十縣龍泉瑞溪沿河等三十四州於是改思州宣撫為思南鎮西等處宣慰使司以仁厚為使二年仁厚卒子宏正襲

黔史卷三

五年施秉臻鵬六洞橫坡內寨等處長官楊止麟來獻版圖春三月辰州一十八洞及九溪九渡米坪散毛狃溪洞諸蠻結亂衛國公鄧愈為征南將軍楊璟為副討平之 秋八月愈等平散毛三十六洞副將江陰侯吳良平五開單溪古州凡二百二十三洞 降鎮遠府為州隸思南宣慰設清浪梅溪相見柳塘四堡

當是時五溪狃獠諸蠻不服役每有扛擗遞送輒棄中途故設四堡以都指揮顧成監督之

陳特菴曰此堡建在衛先與他處不同

九年仁智來覲

帝賜織金文綺有加詔曰天下守土之臣皆朝廷命吏人民皆朝廷赤子女歸善撫之俾各安其生則長保富貴夫禮莫

大於敬上德莫盛於愛下能敬且愛人臣之道也仁智謝恩歸至九江龍成驛病卒有司以聞上遣使持節調棺給斂賜金緡絮并敕送柩歸思南

十有一年蝗 十有三年夏五月湖南五溪蠻作亂江夏侯周德興率師討之蠻散去 十有四年潁川侯傅友德爲征南將軍永昌侯藍玉西平侯沐英爲副征雲南大軍由辰沅趨貴州普定擒安瓚諸蠻聞風降貴州路通沿途設堡於時尙未建衛初水西宣慰靄翠與貴州紅邊宣慰宋蒙古歹來歸帝優恤之賜蒙古歹名欽已而欽死其妻贖珠代襲宣慰謀與翠妻奢香入貢方物馬匹帝大悅賜金幣服色甚厚奢香置龍場九驛開偏礮東水以達烏蒙烏撒容山草堂諸境西南日闢

黔史卷三

二

翠死香亦循例代襲自是歲歲貢獻報禮之隆亦非他所敢

望也

翠濟火後安氏祖翠妻奢香讒殺都督馬聯雖聯威暴自取而安氏之強自是不可復制矣

二十年移思南宣慰治於鎮遠

所謂思州爲鎮遠監眼大田谿洞是也當太祖時思南思州二田稱強盛畫疆分理貢使不絕恩遇亦加隆焉然素循謹奉法未若他州負固橫恣晚僅以私怨失國不猶愈於屠慘者乎

置衛

設指揮千百戶五所每衛約官軍五千六百有奇建屯堡置哨凡軍丁俱係湖廣郴桂二州七縣三戶塚籍朋克改思州偏礮司得勝寨爲偏礮衛遷其民於東 二十有五年

城偏礮衛 二十有九年清水苗金牌黃作亂都司發兵捕之
遁去獲其黨五百餘人械至京師以其脅從宥死戍邊塞既有
言金牌黃匿宣慰家者詔勿問 三十年春三月古州苗林寬
叛殺龍里千戶吳得鎮撫井孚 冬十月鎮遠侯顧成統兵勦
捕鎮遠臻部六洞賊苗高坡九股黑苗富銀阿賴等叛殺本管
土官劉友尙至是并勦平之鬼長箐苗作亂指揮萬繼百戶吳
彬戰死都指揮許能率兵會偏礮衛兵擊敗之

建文元年春正月黃霧四塞

成祖永樂九年偏礮左所千戶宋成及苗戰於黃白水陣亡
十有一年革兩宣慰使析置府

倚漢武陵郡本無陽縣地晉爲無陽隋屬清江郡唐長安四

黔史卷三

三

年以沅州之夜郎渭溪二縣置舞州 寶元年更夜郎名峩
山又屬思州寧彝郡大厯五年改爲獎州又爲思播二州之
地思州之思邛思王播州之胡刀瑯川諸廢縣皆在府境內
唐末沒於蠻石晉時附於楚馬希範宋屬思州田氏元初置
鎮遠沿邊溪洞招討使後改爲鎮遠府屬思州軍民宣撫司
明洪武五年改爲州屬思南宣慰司至是廢思州思南兩宣
慰析置府先是仁智入覲時仁厚子宏正與其弟宏通等來
帝命禮部皆優賜十有一年仁智子大雅襲奉表謝恩十有
四年大雅入覲二十年宏正死子琛襲土官趙士能來貢馬
永樂八年大雅死子宗鼎襲初宗鼎凶暴與其副使黃禧構
怨奏訐累年朝廷以田氏世守土又先歸誠曲意保全改禧

爲辰州知府未幾思州宣慰田琛與宗鼎爭砂坑地有隙禧遂與琛結圖宗鼎率兵攻思南宗鼎挈家走琛殺其弟發其塚戮其母尸宗鼎訴於朝屢敕琛禧赴闕自辨不至潛使人入教坊司伺隙爲變發覺遣行人蔣廷瓚召之復拒命乃遣鎮遠侯顧成將兵壓其境執琛禧械赴京師皆引服琛妻冉氏尤强悍遣人誘台羅等寨苗普亮爲亂冀朝廷釋琛還撫以免死帝聞而錮之以宗鼎窮迫來歸得求減而宗鼎必得報怨以絕禍根帝以宗鼎幸免不自懲乃更逞忿亦留之宗鼎出誹言發祖母陰事與禧奸以構禍本祖母亦發宗鼎瀆傷人倫乃下於理而田氏亡先是帝亦欲郡縣其地而未有間至是謂戶部尙書夏原吉曰琛宗鼎分治思州思南皆爲

黔史卷三

四

民害琛不道已正其罪宗鼎滅倫罪不可宥其思南思州三十九長官地可更郡縣設貴州布政使司總轄之以蔣廷瓚爲布政使命顧成勦臺羅諸寨斬普亮思州乃平十有二年析其地爲八府鎮遠思南思州石阡銅仁黎平烏羅新化後省烏羅新化二府貴州爲內地自是始

仁宗洪熙元年春正月詔貴州就試湖廣
宣宗宣德元年春正月詔貴州就試雲南

夏苗殺楊通諒

通諒赤溪洞長官也有邛水奧崙賊苗張奴劫掠清浪道中爲思州都坪峩異溪長官所獲其父苗銀總劫取之聚兵欲攻思州總兵蕭授飭土官通諒往撫銀總伏兵殺通諒又劫

埂崗授奉調辰沅都衛兵萬四千人勦之會於清浪衛指揮張名克奧洞盡殺其黨銀總遁冬十月偏礮指揮使陶貴等昌江陣亡

五年苗殺清浪守葉受

烏羅知府嚴律已言所屬治古答意二長官石各野等聚眾出沒銅仁平頭瓮礮諸處誘脅蠻賊石雞娘并算子坪長官吳必郎等共爲亂招撫不從緣其地與鎮溪酉陽諸蠻洞接壤相煽爲亂請調官上兵勦之平定後宜置衛所巡司以守之事聞命總兵蕭授與鎮巡諸司議授築二十四堡環其地守之兵力分卒難捍禦益四出劫殺清浪鎮守勢益獗巡按御史以聞言生苗之地不過三百餘里乞別遣良將督諸軍

黔史卷三

五

殄滅授復言賊苗吳不爾等遁入算子坪結生苗龍不登等攻劫湖廣五寨及白崖諸寨爲患滋甚宜合川湖貴官土兵分路并力攻勦庶除邊患從之既降敕諭授言暴師久患蹉跌爲蠻羞或撫或勦朕觀成功不從中制

英宗正統元年春正月雪雹 三年復鎮遠爲府 四年免徵

鎮遠等司鹽鈔

九年冬置施秉縣於前江 改前江長官司爲土縣丞世襲副

之明施秉縣無儒學亦無典史

宋以前俱爲思州地元改前江等處軍民長官司隸思州宣撫司洪武五年改前江爲施秉長官司仍屬思州至是設縣後征苗大勝於此更其名曰勝秉夏六月苗民饑發粟賑之

十有四年邛水十四寨及九股苗同攻府衛城掠府庫遂陷思州府

夏四月偏礮官軍及苗戰於地壩瓮塘等處右土官楊昌進陣亡草塘苗龍惟保陷石阡府知府胡信遇害又攻赤水城都司張祥戰亡連陷平越衛黃平所及思南府總督侯璉都督方英調兵討之土木之變侍御申祐殉難祐思南人當其時求之遂及於難後蕭重望奏請乃奉詔爲祐立祠賜諡文恭

景帝景泰元年春霖雨秋苗叛益張保定伯梁瑤佩平蠻將軍印督師勦之

先是王驥征麓川悉調貴州兵以行久之諸苗叛驥還討擒酋韋富撓等獻俘驥以老病告歸麓川之役讀詹廣文一疏可爲痛哭王驥爲封疆大

黔史卷三

六

臣其何以對君父使璉代璉駐師雲南相去遠瑤自湖廣入貴州未

至其當推貴撫無敢往者獨修撰王恂毅然請行行則新添龍里平越畢節等衛被圍已久兵少難進時值兵部侍郎何文淵上言以兵疲民困轉運不給而苗人叛服不常議暫撤布政以下大小官吏及從征官軍如洪武年例設宣慰使司管屬土人設都司都指揮等官鈐束軍衛而以大將鎮守之便時邊警方急眾唯唯謂文淵言是獨兵部尙書于謙執不可以爲太祖高皇帝開創於前成祖文皇帝經營於後迄今將百年法制已定勢無可更比來邊將處置乖方加以南征之師屢出遂致賊寇竊發小有枝梧動言棄擲日蹙國百里伊誰之咎文淵先曾奉使貴州備諳山川苗蠻情形宜量從

陞職給敕以往令相度形勢便宜行事至賞賜銀幣卽就被官庫支給不必京師運發議定請旨帝是謙言然不復遣官祇著璫瑤整理進勦時驥尙候代未行并勅協力於是副總兵田禮進兵解平越圍璫調兵勦水西瑤由烏撒會於畢節援安南衛遂克彌勒安南等二十餘寨降阿蒙等五寨賊復圍平越璫回兵擊却之遂解清平圍至重安江與驥會至是寵里至鎮遠道路皆通而普定之圍未解璫自將趨普定疾戰矢下如雨時禮兵亦至遂大破之諸衛悉平

四年苗酋韋同烈據香爐山作亂三月右都御史王來討平之先是安莊女苗撒得爲土舍林天仲妻不相能值富蠱作亂得乃挾兵從蠱圍平越蠱惑之迎得巨魯寨通得住三日許

黔史卷三

七

事成爲后會驥征麓川歸乃擒蠱并得解京師時香爐山賊惟蠱與同烈最强天仲恨妻得奔蠱曾借同烈兵殺得不克至是得請於朝願爲香爐鄉導立功贖罪值謙遣國初降番徙置河間東昌降番者永樂間邊塞來降者謙慮其乘釁騷動請籍其有名號者厚犒令從征香爐山勒留南中以絕也先之應於是數十年積患一旦潛消以故得得請第殺蠱而使得爲鄉導帥降番行且指之曰苗女之美如是也以歆之得乃引保定伯直搆同烈巢擒誅之而天仲亦斃於軍

五月調偏礮官軍一百二十四名鎮遠官軍一百二十二名防守施秉每衛指揮一員千戶二員春秋更換 夏六月蝥生苗災 大饑 五年賊苗蒙能作亂巡撫王永壽以賊苗能攻圍

龍里所新化銅鼓諸城乞調兵勦之而賊欲取龍里爲巢穴急
攻破亮寨銅鼓羅開諸堡都指揮汪廸爲賊所殺朝議以南河
伯瑛爲平蠻將軍統湖廣諸軍討之能糾賊三萬餘出攻平溪
衛瑛遣指揮鄭泰等以火鎗斃賊三千人斬能龍里而能黨李
珍尙煽惑苗眾官軍討平之克復銅鼓藕洞連破鬼板等一百
六十餘寨覃洞上陸諸苗悉降 冬十有一月偏礮官軍克陳
溪瓮角龍蛟沙革彝地府黃猴等寨 築岑麓等堡

時縣無城防苗患也

施秉縣土人楊勝紀築之

天順七年獲蟲蝦

鎮守湖廣太監郭閔奏洪江南洞賊苗蟲蝦糾合二千餘人
僞稱王侯攻掠鎮遠四寨殺掠人民撫諭不從請合兵進討

黔史卷三

八

命總兵李震李安等分道入賊退守平坤寨追至清水江捕
斬賊首飛天王并飛天侯苗老底額頭等六百四十餘人并
黎平之赤溪南洞等悉平

蟲蝦號飛天王

憲宗成化元年春正月給屯糧各省奏報水災詔戶部勘實被
災地方平清偏鎮辰沅六衛給與屯糧成熟准折月糧 九年
大水 二十年陳蒙爛土苗龍洛道等作亂副都御史鄧廷瓚
率總兵顧溥勦平之

孝宗宏治元年春大旱 八年冬十有一月地震 九年夏五
月大水

十一年春置鎮遠縣

先是宋大觀元年改峩山爲安彝元改爲鎮安至正元年復

爲安奠縣尋改金容金達楊溪公俄等處蠻戾正副長官司
至是置縣於府南週街制定鎮遠縣

十有三年地震 十六年普安妖苗米魯作亂巡撫陳金剿平
之

十有七年夏閏四月設衛學

先是十有二年闔省紳士赴闕請時宦寺李廣蒙格不行十
有四年復請又以火篩入寇中寢至是三赴闕大學士李東
陽疏請制曰可衛乃有學

武宗正德元年春霖 五年地震 六年江律賊寇屯堡鎮遠
官軍及清浪軍討之擒賊首方四方七於平溪河北城下殲焉
七年思州火 八年春設各衛學訓導一員 十有一年御

黔史卷三

九

史洪範奏請將偏礮等衛儒學軍生照縣學例廩膳增廣各二
十名其廩餼米於衛倉支給 十有三年夏貴陽大水 十有
五年巡撫秦金奏將偏礮衛等學赴武昌鄉試按是時安貴榮
欲減驛王守仁移書懇切曉諭水西安靖垂六十年可謂一紙
賢於十萬師矣已而講學龍場席書又爲諸生請陽明講學於
程番論者謂尹珍北學於許慎應奉歸以經學授梓里漢末至
今杳難稽已愚謂貴州之學實開自陽明當其時接踵而起者
思南有李同野貴陽馬內江清平孫淮海皆卓卓可紀貴州雖
僻陋應發彼有人焉之嘆

世宗嘉靖元年春晝暝 三年思南水德江澚巨石自轉 四
年夏大水思南虎入署 十有三年夏大水 十有五年秋七

月地震有聲 十有六年夏四月雨雹大如卵 十有八年春
調平清偏鎮四衛兵伐安南指揮高序戰死 夏五月大水算
子坪逆苗龍老恰之子龍母叟聚眾及酉溪苗頭龍求兒糾銅
平苗攻劫清浪衛 十有九年正月進於爆木坪是時苗尙知
懼每寨各出牛酒求退我師至三月五寨司奸細侯答保刻箭
誘算子坪團溪板粟惡黨及銅仁且達諸苗出劫又鎮溪亞酉
苗龍柳比復搆亂苗之禍遂大屯聚騰爾山辰沅兵備副使李
瑜調永保土兵委平溪都指揮高崗鳳同指揮朱衣進抵算子
坪苗頭龍遠吳得狗等咸稱願隨軍征討生擒首惡龍答已等
俘獲百二十餘人並擒奸細答保又遣辰州衛尤欽傳啟忠督
鎮溪兵三千人入騰爾山功幾成奉湖廣撫按火牌令退師議

黔史卷三

十

撫 二十有一年興隆天柱地震 算子坪逆苗復糾合銅平
苗攻圍麻陽縣城 二十有二年都御史萬鏜遣指揮李勇參
將崗鳳都指揮潘璵等督土官田應朝帶領鄉導搜出賊首求
兒母叟擒獲柳比吳老瓦等共五十餘人鏜臨辰州以賊黨未
盡歸降且阻留撫苗百戶二員於山內乃調兵萬餘令守備欽
指揮吳山何清葉森督土官彭宗順應朝彭蓋臣田興爵等入
爆木坪防守五寨麻陽地方於了刺關把截鎮算守備李英往
來提調是時苗賊蓄食頗多羣聚抗敵復添兵萬餘次第搜山
斬獲無算奪回撫苗百戶二員俘男婦七十餘人因暑雨班師
冬銅鎮苗攻陷石阡府推官鄧本中被執 二十有三年秋
七月偏礮地震 二十有四年夏旱疫 二十有五年詔鎮偏

平清四衛赴黔鄉試裁湖廣舉人五名附之以諸生洞庭覆舟之變也施志云提

學海信題請舊志云衛人都二十有七年賊苗龍許保攻陷

印江縣總督張岳率兵討之不克二十有九年銅仁苗陷思

州府知府李允簡被殺才不足以馭眾知不足以保連年旱

饑免秋糧霜結如花鎮遠府西街火冬十有一月縣街火三

十年容山老毛固巴蜡等苗劫掠施秉縣知縣撫降之夏饑

三十有二年岳進討湖貴逆苗遣總兵官石邦憲進兵獲首逆

杖殺之

先是篁子坪土官興爵以事繫辰州諸苗賄吏陰脫歸藏臆

爾山久之稍聚眾自大鉤結諸溪洞為亂至是為官軍擒之

並杖殺應朝而其亂始定應朝者本土指揮與興爵同族前

黔史卷三

都御史萬鏜用為巡捕使伺興爵應朝反結興爵煽諸苗鎮

篁銅平及賊苗龍許保等皆其所陰結為應援者至是杖殺

之田應朝龍許保等皆當書誅此不書書殺者以前督萬鏜信任故故以相殺為文

三十有七年採大木於鎮遠偏礮施秉等處四十年春不雨

容山司賊苗焚劫施秉縣冬十月城施秉縣舊志云嘉靖四十四年冬十月

施志云四十年未詳孰是

穆宗隆慶四年夏六月蚩尤見兆播州用兵也秋八月螟

神宗萬曆二年夏天柱螟八月思南火五年鎮遠府西街

火民人江朝三失火延燒府治大門悉燬人見有黑面大神以袖拂之乃熄威清虎入城傷三百

餘人六年播州大疫七年秋九月偏礮黃平地地震十年

夏五月普安大水十有三年運大木至涪州委土官楊騰霄運也十

有九年春三月黎平蛟出府儀門傷人 貴陽雨雹大如卵
二十有四年播州楊應龍大作亂

侵虐偏礮江外四十八屯焚掠鎮遠東坡濫礮應龍之叛也
逆跡未形參將宋世臣與何承恩密告變至是應龍誦世臣
父鑾孛家匿偏城中襲執指揮陳天寵索鑾等慘殺之播州
自洪武初楊鏗內附世授宣慰司地方千餘里西北塹山東
南俯江稱西南奧區至應龍性猜狠嗜殺數從調征恃功驕
蹇知川兵脆弱有窺蜀志間出剽州縣嬖小妻田雌鳳讒殺
妻張氏用誅罰立威所屬五司七姓被殘虐二十年以事逮
繫重慶獄應龍詭以征倭自効得脫重逮不出黔蜀會師征
勦無功重慶知府王士琦諭應龍至松坎聽勘諭斬得贖輸

黔史卷三

十三

金四萬兩助採木以次子可棟羈府質追未幾可棟死於重
慶促喪歸不得復檄完贖應龍大恨擁兵驅千餘僧招魂而
去由是分遣土目置關據險厚撫諸苗名其健者曰硬手大
掠大干諸壩焚劫草塘餘慶二司及興隆都勻各衛又圍黃
平殺重安江長官勢大熾進掠平越洪頭高坪新村等堡
二十有七年巡撫江東之遣都司楊國柱帥兵及應龍子朝棟
戰於飛練堡官軍敗績國柱指揮李廷棟戰死東之罷以郭子
章代巡撫而起李化龍總督四川節制雲貴湖廣軍務調東征
諸將劉綎陳璘等南征六月應龍乘大師未集陷綦江縣屠其
城初賊本無意竟反徒以猜忍猖狂旣以贖金喪子故且覆我
師飛練則騎虎勢不得下以故益結九股生苗及黑脚苗爲助

十有一月應龍屯兵官壩聲言窺蜀已而焚東坡濫橋黔楚路

梗

按王士琦松坎聽勘之役應龍面縛跪道左其非堅於叛亂可知况屢立戰功且輸金贖罪其曲直當有任其咎者子喪不歸與漢吳王淠同情特以猜嫌殘暴激而成之故書從其輕

二十有八年春二月化龍駐

節重慶徵兵大集時春雨渟泥已而天開霽丙戌誓師分八路

川師四路總兵劉繼由綦江入總兵馬孔英由南川入總兵吳

廣由合江入副將曹希彬由永甯入黔師三路總兵童元鎮由

烏江參將朱鶴齡由沙溪總兵李應祥由興隆湖廣一路由偏

礮分兩翼總兵陳璘由白泥副總兵陳良珙由龍泉巡撫子章

駐貴陽策應總督化龍自將中軍諭諸將以抵婁山關為期且

曰關外且戰且招降多不可勝誅也關內疾戰勿受降師不可

老賊詐不可信也綦江道最要繼當之應龍熟繼名頗懼益兵

黔史卷三

三

守要害繼進兵李漢壩大戰生擒其將穆照等斬獲甚眾應龍

遣子朝棟驍將楊珠拒松坎繼又敗之朝棟潰走遂大捷應龍

固憚繼威名欲以奇兵挫其鋒至是膽益落聚守石虎關初繼

聞征播命言官疑繼與應龍有舊繼辭化龍以平播非繼不可

固留之力薦於朝繼乃受任進克石虎直抵婁山關婁山萬峯

插天叢箐中投徑必側足賊設木關排柵十三繼用奇攻奪其

關逼至永安莊時三月二十九日也繼持重都指揮王芬者勇

而寡謀以連勝有輕敵心獨營松門堽之賊謀奪婁山四月朔

夜襲破芬營殺芬守備陳天綱天全招討楊愈俱戰死亡士卒

二千人繼聞急救夾攻之賊始却繼懲前失疾戰疾力賊奔窮

追至養馬城是日應龍幾被獲乃不敢復窺婁山會孔英壁海

龍固下後數日縋兵亦至乃合攻龍爪海龍諸固壓海龍固而壘初化龍刻師期諸將莫利先入孔英所將邊卒及土兵皆獷悍孔英道南川獨險遠未至重慶時推官高折枝監紀軍事請行折枝沉而有謀故師獨先入先是元鎮有烏江之敗所部三萬人大半溺烏江死江水為不流烏江最深險觸在壁立又以象戰駕象者斃象反走又斷浮橋為賊所紿遂大敗諸路聞之皆懼却朝議逮元鎮以李應祥代將賊所恃黃灘一關最險要聚徒死守會降卒有石勝奉者告曰去黃灘三十里有三關入播門戶也先襲破之則黃灘難守應祥然其計以故由墳林暗渡襲關後賊潰敗應祥直抵海龍固璘由偏礮亦至已而諸軍四集團海龍固海龍固者賊所倚天險飛鳥騰猿不能踰者賊

黔史卷三

勢急父子相抱哭上固死守每路告降緩師化龍斬使焚書不許應龍起提刀自巡壘見四面火光燭天倉皇嘆泣同愛妾二闔室自縊焚死廣獲其子朝棟及妾田雌鳳時六月六日自出師至滅賊凡百一十有四日化龍露布以聞播州克平

不書 伏誅 二十有五年春三月城天柱縣

從縣令朱梓請也先是請題設賜名天柱縣梓治天柱最孚民情條陳十事上可

行之百廢俱興循良不下穎川渤海今各鄉聚皆有祠祀

十有六年鎮遠火及明倫堂稅課局

街民熊良失火延及稅課局而先書明倫堂者重之也又按下庚子二字

庚子又火

熊夢祥家失火延燒兩街火焰騰及沙灣稅課局悉燬至酉時人見火龍二丈餘由石屏山飛越而出火乃息是夜車家灣亦被燒

設偏沅巡撫 四月朔以江鐸為僉都御史巡撫偏沅駐沅州 二十有九年春正月甲子子章如鎮遠命楚師粵師討皮林 三月遣指揮李楷勦皮

林苗平之

夏四月鑿黃平河

子章班師旋偏礮鑿也

此洞最險惡有大蓮花小蓮花之名先是童謠云要得三洞開除非諸葛

來已而子章鑿開之遂改名諸葛洞

改平清偏鎮四衛隸貴州 三十有一年割湖廣黎平隸貴州

設鎮遠府推官 三十有二年巡撫郭奏築龍泉甕安湄潭餘

慶黃平等城割播州地分設遵義平越二府 三十有六年鎮

遠學宮戟門及鄉賢祠兩道院署火

街民雷祖保失火延燒兩街府大門吏廳稅課局悉毀

三十有七年大水壞田紅苗攻陷印江縣典史邵士元戰死

四十年印水土目彭必信不法誅之

印水土舍楊光春行印水長官司事老而貪頭目彭必信為

黔史卷三

十五

之聚斂民怨甚逃諸梁上巴野六甫鬼計諸寨參議以上皆

議請免光春改土為流請未行光春與必信單騎遍馳所部

洞寨給言漢兵勦夷民當斂金贖死凡三十六莊七十二寨

合得金六百兩兩人分其金都御史何起鳴詢知之下都清

道逮光春繫獄瘐死不及必信於是用漢經歷劉試到印水

管事立青頗茨瓦四哨每哨兵二百凡不為兵者佐糗糧三

斗魚鹽月人一劬有八兩皆廩食餘稅而簡土吏目何文奎

掌四哨別選精兵五十二人立營居中裨將徐珂巡徼之未

幾必信乃密誘諸苗謂新法不善不利苗請十五洞長約為

我治裝我當愬之朝以復舊例洞長唯唯乃議每洞出裝銀

三兩合得四十五兩走京師上書謂巴野梁上六甫鬼計諸

寨酋長喬鵝苗女喬苗柴虎高良等數百人阻山爲亂樹旗
幟鼓角攻七十餘寨殺男婦五百人而指揮陶起中不之問
也反索土吏楊光春鏹搯而殺之改舊例用新法欲求苗不
反難矣書上不省然必信意自得歸謁知府王一麟猶揚揚
一麟叱縛之下獄乃檄召諸苗以爲必信所奏喬鵝事此在
萬曆初孰與今日今日若等第不利漢吏耳乃假此爲恢復
計有國法在不便思若等所患苦或以兵餉賦米三斗過甚
府能爲若等寬之故事本司歲給白蟲鋪米每洞月八斗凡
一百五十石他於平溪驛剩餘徵二十二兩此皆可足餉今
以後毋苦諸洞諸洞皆叩頭稱便乃坐必信誣罔罪誅之而
新法竟行

黔史卷三

六

四十有三年都勻地震大旱 兩江苗夜襲松溪橋掠西關把
總黃如龍率兵追至尹坡哨殲焉 四十有五年三月安莊衛
白蜃羣飛蔽天越三日火 四十有六年貴陽大疫 四十有
七年蚩尤見 四十有八年蘭州土司奢崇明叛陷重慶府遂
陷遵義府

熹宗天啟二年二月水西安邦彥叛擁眾圍貴陽城

先是邦彥詣巡撫李樞請討崇明自效不許邦彥素黠桀其
從兄堯臣妻奢社輝崇明女弟也生子位當立幼邦彥奪而
有之實欲借此起事故詭言之當其時使一勇士縛之如縛
雞耳乃逸之而去歸卽謀不軌樞屢疏請增兵益餉中朝方
急遼事置不問會樞被劾以王三善代撫而崇明已陷二郡

貴陽大震樓遂留視事時城中兵不及三千倉庫虛殫樓與
巡按史永安貸雲南湖廣銀四萬兩募兵四千儲米二萬石
治戰守具急遣總兵張彥方都司許成名黃運清副使朱芹
提學僉事劉錫鉉等援四川戰屢捷遂復遵義綏陽湄潭正
安桐梓諸縣至二年二月邦彥浪聞崇明已陷成都遂挾安
位擁眾圍貴陽城自稱羅甸王四十八支及他部頭目安邦
俊陳其愚烏撒土目安效良等皆蠶起相應分兵襲畢節都
司楊明廷戰敗將士三千人俱沒又分兵陷安順平壩效良
亦攻陷霑益而邦彥自統水西軍及羅鬼苗狝數萬渡六廣
河直趨貴陽邦彥始舉事便擁兵圍省垣其逆較著
三言圍貴陽城甚之也故後書誅之別遣王
倫等下甕安襲偏礪以阻援兵洪邊土司宋萬化糾苗狝九

黔史卷三

七

股陷龍里樓永安閉城堅守賊先後攻陷廣順定番普定威
清普安安南諸衛數千里盡爲賊有初被圍彥方運清來救
賊縱之入城曰使耗彼糧城中果大困川廣總督張我續巡
撫王三善徵兵未集不敢進樓連疏告急卒不進會彥方等
出戰屢捷賊退保則溪副總兵徐時逢參將萬仲仁來援遇
賊甕城河食盡賊擊之軍潰諸將馬一龍白自強商士傑等
殲焉援遂絕邦彥聞三善將進兵攻益急十二月三善進兵
大破賊於龍里貴陽圍解三善由鎮遠分左右二部進自將
二萬人與參議向日貞副總兵劉超參將楊明楷王建中等
由中路當賊鋒一日抵新添又一日次新安是夜報賊至軍
議退三善手劔疾呼曰退卽死此超下馬斬却者二人而自

揮刃斷賊標時賊驍將阿成被超斬其首賊披靡大軍齊進
遂奪龍里城次日軍抵貴陽城下邦彥已遁去貴陽受困已
十月旦夕恐陷忽賊兵奔潰前鋒至城下呼曰新撫至矣軍
民大悅檣等迎入城三善不可曰賊兵不遠軍心猶未定也
遂營於南門外大雪次日移營則溪諸路兵先後至三善以
二萬人破賊十萬有輕敵心且憂乏食欲因糧於敵令總兵
劉超渡陸廣趨大方搗安位巢以參事楊世賞監之令總兵
張彥方渡鴨池搗邦彥巢以副使何天麟監之別將都司線
補袞出黃沙渡剋期並進超等至陸廣連捷諸將益輕敵超
渡陸廣賊乘半濟擊之獨山土司蒙詔先奔官軍大敗超走
免先鋒楊明楷爲所執諸將姚旺等三十六人殲焉賊遂攻

黔史卷三

六

破鴨池軍部將覃弘化先逃彥方保威清惟補袞軍獨全賊
復蠡起土酋何中尉進據龍里邦彥使李阿二圍青巖斷定
番餉道率宋萬化吳楚漢爲左右翼自將趨貴陽遠近大震
三善急遣遊擊祁繼祖等救龍里王建中劉志敏救青巖繼
祖燔賊牌五十寨建中亦燔賊四十八莊龍里定番路通又
夜遣建中繼祖搗楚漢八姑蕩燔莊寨二百餘賊溺死無算
擒宋萬化邦彥氣沮羣苗不敢出是時川撫朱燮元屢破崇
明兵崇明窮蹙投邦彥四川總理魯欽馳赴貴陽擒何中尉
彥方亦追賊鴨池而賊復乘間陷普安時代總督張我續爲
楊述中駐沅州畏賊朝命屢催始移鎮遠三善議會師進討
述中諸將多持不可三善排羣議以進三年十月自將六萬

人渡烏江次黑石連敗賊斬前逃將覃弘化以狗銳意進師所向皆捷三善渡渭河邦彥狼狽走師抵大方入居安位第位借母奢社輝遁火灼堡邦彥竄織金先所陷將楊明楷亦還位窘遣使詣述中請降三善屯大方久食盡述中不為援不得已議退師

誤矣當堅守大方徵餉貴陽調滇兵入霑益蜀兵入畢節便可成禽

四年正月王師敗績於內莊巡撫王三善死之三善以糧盡焚大方廬舍而還賊躡之參將王建中副總兵秦民屏戰沒官軍且戰且行至內莊賊斷後軍三善還救士卒多奔陳其愚者賊腹心先詐降三善信之以故軍中虛實賊知之及隨三善行遇賊其愚衝三善墜馬三善知有變急解印綬付家人拔刀自刎不殊羣賊擁之去罵不屈遂遇害

黔史卷三

九

同知梁師泰主事田景猷等四十餘人皆死總督楊述中回籍聽勘是役也所謂入虎穴探虎子矣虎子既不能得穴何以離離則為所傷三善不諒彼己昔何以入今何以出宜其敗也

四月起傅宗龍巡按貴州命右副都御史蔡復一代述中賜上方劔便宜行事時喪亡之餘兵食俱絀斗米銀八錢復一勞徠拊循人心乃定召集將吏申嚴紀律遣魯欽救龍里斬賊五百餘都勻凱里者運道咽喉也先是邦彥結諸苗出劫官道黔楚路梗劉超拔賊巖頭寨移師克平茶上下皆通已而邦彥驅羅鬼結四十營於斑鳩灣結寨二十餘里復一復遣欽及總兵官黃鉞分道禦之欽率部將張雲鵬劉志敏鄧玘等大破賊於江家冲鉞及參將陸夢龍副使楊世賞大破賊於蔣義寨斬首千

五百級搜山復斬六百餘級邦彥奔河西欽鉞窮追而夢龍等分駐三岔河岸爲後勁前鋒雲鵬玘等深入織金織金者邦彥巢也緣道皆重關疊隘木石塞山徑將士用巨斧開之或攀籐穿竇而入斬首千餘賊遁入深箐而邦彥竟逸是役也焚賊巢數十獲牛馬甲仗無算宗龍摺陳其愚誅之肆諸市民心大悅

五年正月魯欽等旋師渡河賊從後襲擊諸營盡潰死者數

千人

此又何以旋師天下豈有孤軍深入而得善返者哉聖人所以重奔而殿也

時蔡復一爲總督朱燮元以尙書督川湖諸軍以故復一節制不行於境外欽等深入四川雲南兵皆不至復一自劾因論事權不專故敗巡按傅宗龍亦以爲言廷議令燮元督河道令復一專督五路師御史楊維垣獨言燮元不可易請令

黔史卷三

三

兼復一任帝用維垣言解復一任而以王瑊爲右僉都御史巡撫貴州復一俟代仍拮据兵事與宗龍計勦破烏粟螺蝦長田十五寨叛苗此係下游初自平越至興隆清平二衛苗二百餘寨錯踞其間以長田之天保阿秧爲魁邦彥初起卽結二酋使通下游六衛消息且不時剽劫官道按察使來斯行啗阿秧使圖天保阿秧反以情告保斯行乃誘斬阿秧議討天保會以憂去復一令知府周鴻圖代監軍會阿秧弟阿賈與天保請兵邦彥復兄仇復一令鴻圖欽參將楊明楷胡從儀三道進斬賊魁五十四人生禽天保阿賈獲首功二千三百五十級破焚一百七十四寨盛夏興師冒暑雨嵐瘴積年劇寇掃除土人謂二百年所未有復一旣奏功未報十一月卒

於平越軍中

六年春三月邦彥復大舉入寇魯欽禦之賊夜襲欽營士卒逃
竄欽自刎諸營悉潰賊勢復熾省垣大震巡撫王城急遣將禦
之稍戢川督爨元以憂歸加偏沅巡撫閔夢得總督控制五省
七年春參將楊明輝奉命宣諭安位令擒獻首惡為邦彥所
殺 偏礮指揮許國柱力戰陣亡 肅清偏礮上下道路 黑
苗屢出劫官道議廢施秉縣 夏五月蝥生 天柱晝晦 修
治營哨

莊烈帝崇正元年秋七月詔起朱爨元為總督仍兼制雲貴川
湖廣五省軍務

二年秋八月爨元調兵討逆賊安邦彥誅之

凡書誅應有日此
不日者舊記失也

黔史卷三

三

凡逆首斃於亂
軍中亦必書誅

先是王三善由陸廣入大方凡百七十里皆羅鬼巢窟前衝
後截已失地利爨元初議滇兵出霑益邊安効良應援而別
布兵天生礮尋甸等處以絕其走路蜀兵臨畢節扼其交通
走四裔之路而別出龍場巖後以奪其險黔兵由普定渡思
臘河徑趨邦彥巢穴而陸廣鴨池搗其虛粵兵出泗城分兵
策應然後率大軍由遵義鼓行而前尋以憂去未及用總督
閔夢得繼之亦以大方路險賊惟畢節一路用兵當自永寧
始漸進漸逼以重兵扼之乃可成禽亦不果用至是爨元至
乃檄滇兵下烏撒蜀兵出永寧畢節各扼要害而親率大軍
駐節陸廣以逼大方時蘭賊奢崇明號大梁王邦彥號四裔

大長老其下歹費阿鮓等皆稱元帥蹂躪川黔土地已七八年聞官軍至果力趨永寧先犯赤水熒元授意守將許成名佯敗引之出度賊已抵永寧分遣總兵林兆鼎由三岔入王國貞由陸廣入劉養鯤由遵義入邦彥分兵四應力不支羅乾象復以奇兵繞出其背急擊之崇明邦彥皆被創斬其首獻熒元露布以聞水西平

九月合兵討水西餘黨安位出降許之熒元議設州縣分治其地各置副將鎮守

初邦彥常勾結九股苗聚眾出劫官道以牽制官軍熒元以勢重水西不之顧至四年陝西道御史楊通字通字偏礪人上疏請討黑苗乃命熒元督總兵林兆鼎率所部羅聯芳王自亮

黔史卷三

三

等勦寨膽舊州黃岑白壩兩江等六十七寨平之

三年思南火 四年天柱大水 秋七月地震 疏通偏礪道

路

復施秉縣營楊坪

以提調楊凌奎守之

遂城涼傘

以守備羅聯芳守之

按雍正十三年逆苗不靖屢犯施秉城梗台拱清江大路官軍由雞擺尾進交汪不能前遂營於蓮花壘賊乘勢圍台拱并陷台拱之排哨汛復圍清江并圍清江之柳羅營哈元生督兵奮力勦滅奪賊關者五破賊城者一摧賊營者六斬獲無算於是清江圍解清江受困已數月矣至是糧道通已而台拱施秉以次削平後張經畧由八弓駐節清江由清江駐節凱里當賊苗之未退也率摠勝秉前二十里涼傘寨今改爲新城勾結裏九股牛皮箐生苗壤地交接謂之下九股故

必城涼傘以扼九股皮林之吭而開台拱清江門戶則其勢在我當是時官軍率由山僻小徑經畧之入清江也由八弓繞梁上汎其出也由勝秉蓋兵法以地形爲把握地形以道路爲要害未有不明於道路而能得地形不明於地形而能知用兵者予故獨詳於營汎而嘉是城涼傘竊嘆王或菴之先獲我心也與是役也所以阻逆苗之劫掠而安數州之奔離厥功幾與春秋城虎牢同惜所守非人又當明末流寇擾攘苗亦乘勢擄掠民何以生九股之役哈元生先駐節清平張廣泗後駐節凱里倘元生當時竟駐節涼傘則苗塞其喉偏礮黃平餘慶當不至被焚戮若是其可慘也或曰非也倘元生當日不駐兵羊老則清平以上省垣不可保矣且羊老

黔史卷三

三

去涼傘幾二百餘里稍遠又爲賊窟不若先駐偏礮觀勢再進方據涼傘爲當

五年十月天柱天鼓鳴地震有聲 六年秋八月湄潭縣蝦蟆

數萬匝城旋沒 七年夏大水鎮遠礮圯祝聖礮也 十年開

州北極觀鐘與龍鬪 十一年夏貴陽大水 十有四年夏六

月都勻燕數萬集府署 十有五年地震 苗狎聚眾出劫官

道圍清平黃平參將宋民倚擊定之 十有六年畢節大雨雹

黑苗阿燒等勾九股兩江革彝冷西臻凱雞講大肚高坡諸

苗攻破施秉縣殺楊凌奎於楊坪羅聯芳棄城走鎮遠一帶地

方爲所劫掠 夏六月詔總督李若星統黔兵赴楚協勦流寇

八月若星帥師次偏礮懸購阿燒臻尙土舍劉成龍斬阿燒以

報 十有七年春正月朔大風霾三月流寇陷京師若星聞變
自偏礮歸

黔史卷三

西

雍川猶法賢 編

貴陽熊湛英校刊

大清

世祖章皇帝定天下未遑邊徼四年春正月流寇孫可望陷遵義府

先是流寇張獻忠據蜀屠戮蜀人殆盡其黨可望李定國劉文秀艾能奇皆爪牙晚有隙會獻忠中流矢死可望率眾奔貴州破遵義襲據貴陽城黔撫曹遁去城中數萬戶四路奔避可望搜捕箐洞殺掠無算千里蕭然按察使張耀參議曾益都司陳瑞徵知州陳新第據定番州城死守新第蜀之長

黔史卷四

三

壽人有知畧策貢生饒謨集弓弩手舉勇士簡成書爲左師軍洞口臥龍土舍龍在田龍起潛佐之守備陶世顯爲右師軍土橋大龍土官龍飛佐之張陳督中軍田椒山出水車抵青巖繞賊後以斷賊饗成書世顯迭戰殺賊數百人生擒二十一人可望憤甚調艾能奇師五萬至眾寡不敵右師潰陶世顯龍在田龍起潛龍飛俱戰歿賊遂蠡擁趨東北關城中矢石齊下成書以藥箭射中能奇未斃賊少却俄而城中火起人爭滅火賊遂乘勢登城城陷耀被執能奇曰公吾梓里也耀曰爾爲賊吾爲朝臣何梓里之有罵不絕瑞徵亦大罵遂遇害同日死者學官尹大任徐鑣吏目安紹祖諸生周齡六尹思民胡允中黎維垣鄉官顧人龍妻李氏子大元俱赴

水死司獄陳玉環自經死新第正衣冠縊於署曾益縊於道
署饒謨攘臂大呼士卒奮興無不一當十猶殺賊百餘人成
書亦格殺數十人皆戰死舉人毛琛投井死原任教授艾養
中諸生周卜年尹湯賓熊鍾杜凡六赴火死諸生謝賜璠黎
應陽江山秀潘達黎應辰投泮水死張承祖妻吳氏赴蓮花
池死武舉蒙九錫不屈死凡百五十人城中竟無一生者而
賊之爲我殺者亦損其二

三月可望圍鎮寧州參議武右文據守城破被屠並屠安南普
安等城遂入滇故明總兵羅聯芳與前撫范鏞入據貴陽城時
黔省未頒正朔寇苗互攻劫迄無寧日

先是三年冬甕安李樹結扁豆合縣皆然一方士言有兵禍

黔史卷四

三

至四年四月苗賊藍二叛糾眾數千攻陷甕安黃平屠戮甚
慘復圍平越故明總兵張才擊走之旋就擒磔於市

十月綦江人王祥率兵數萬襲據遵義府 流賊張先壁俗呼黑神

潰兵突至鎮遠焚掠一空 五年秋八月先壁潰奔偏礮皮熊

即羅聯芳遣平茶司人楊光謙禦之陳特菴曰黔志云六年正月至

最凶暴以人為糧鄉民逃避旋為亂兵所誅十月皮熊與王祥構兵熊攻祥次烏

江為祥敗全軍覆沒 十二月熊祥假和 思南遵義大饑疫

斗米銀三兩 六年流寇袁宗第劉于純相繼屠戮千里無雞

犬聲 八月可望自滇遣白文選襲陷安順府攻青崖白納燕

樓等箐洞旋撤去

先是明桂王子由榔自立於肇慶號永曆至是封皮熊為匡

國公王祥為忠國公文選襲入貴陽

七年八月可望自滇襲入貴陽皮熊走清浪追奪其兵 冬九

股苗出劫鎮遠府衛城兵科給事中程源駐偏礮王祥遣兵夜

襲以去源四川江津人與祥同鄉故襲以去白文選陷平越府都督同知徐登高

被執死楊友楠出奔徐楊皆偏礮人可望大殘施秉臨田徵租劫去

取十之七 八年可望遣官清丈思石黃施江內外屯田徵租

可望攻遵義王祥兵敗自刎 九年可望迎由榔於桂林置之

安籠所無人臣禮 冬甕山壩苗鄧保羊紗糾平定司苗焚劫

官道總鎮武邦賢擊却之并設子營於凱里施秉犄角可望出

按沅靖諸營旋偏礮杖殺舊指揮疑其怨望不服也十年大荒疫山

土崩裂大水掩禾 十一年大疫 春三月鎮遠火毀民居殆

黔史卷四

盡 十有二年夏四月虎雷傷人殺禾令虎將以毒弩伏殺其四乃止十有

三年大旱自秋八月不雨至夏四月 蝥生 十有四年春畢

節雙井流紅水龍潭流黑水 九股兩江賊苗劫油榨關殺傷

撥頭虜去驛馬鎮遠偽知縣陳然率兵追至鼓樓坡奪回驛馬

秋七月復焚劫中屯殺寄居鄉官曾惠三謝攀龍等數十人

自崇正末流寇潰兵疊相屠毒而可望蹂躪滇黔已十餘年

殘虐不下於獻忠患莫可言乃復遭苗人乘亂劫掠大肆猖

獗民生被害子遺殘黎直待王師恢復就撫者湯火餘生而已

八月施秉縣前江水赤 恒雨自秋八月迄十月 冬潰兵至

城市鄉民逃匿山箐諸苗乘釁出劫焚馬院殺土通判楊貽業

數十人連年避兵田園為蕪 可望與李定國有隙定國敗於

新會將由安龍走滇可望偵知之促由榔移黔由榔故遲行定國遂奉由榔入滇可望率兵與定國戰於交水會白文選馬進忠內變大敗還劉文秀率兵追至貴陽 十有二月可望奔長沙降伏誅 十有五年春三月

帝命宗室寧南靖寇大將軍羅托故明經畧洪永疇帥師取貴州

次偏礮 秋九月安遠靖寇大將軍信郡王鐸尼率師次偏礮

貴州巡撫趙廷臣亦至即於行營受印視事復偏礮衛革去指

揮千百戶世襲部選衛守備代之 十月大兵駐偏礮養馬舉

人宋騰熊上書諫之 十有一月廷臣請以撫標中軍帶本標

兵駐偏礮兼轄興隆凱里容山新城等處地方請設經制官兵

及各省協濟黔餉請頒賦役全書以舊籍盡失也 十有二月議設操

黔史卷四

軍防護道路疏通商賈請安置投誠兵丁 施秉橫坡苗江八

浪劫該管土官楊文耀殺文耀兄貢生文煥知府宋應星捕斬

之 十有六年蠲免荒殘錢糧設驛站馬匹每站五十四暫借備後哉五匹賞之

餉買工食於屯草料糧取給

流賊馮天祐即雙李子伏誅

天祐已降復叛糾賊盧正友冉宗孝呂昌等聚眾於偏礮之

落花屯真珠屯攻湄潭甕安掠平越思南等處總兵胡茂正

李本深捕擒天祐等伏誅

夏四月偽左翼將軍楊光謙偽閩毅將軍丁國祥降國祥即光謙妻統轄

土眾素眾信服既降並受將軍之號安置貴陽 普安州馬乃營土目龍吉兆等作亂

總督趙廷臣巡撫卞三元合疏討平之吉兆與安南衛屯軍王

回子爭田結怨遂私造軍器糾眾仇殺遙與李定國為聲援至是勦平之 五月苗殺施秉縣趙玉奇應星捕首惡老柴斬之

六月旱大饑議賑 秋九月大風拔木 十有七年貴陽大

饑以楚米賑黔從巡撫卅三元請也 夏四月請仍以平清偏鎮四衛赴

黔應試 通黃平水運鑿諸葛洞以運楚米故共修通二百三十里鑿迂險灘五十二處直抵黃平舊州城下 十有八年秋蝗殺稼

聖祖仁皇帝康熙元年春正月停徵練餉 二月續報荒墾驛站

以夫代馬巡撫羅繡錦請也因路險馬斃每馬代夫四名差急者酌借營馬 二年裁思仁道

三年夏五月大水先鎮遠知府張維堅夢神告以鎮郡將沉比曉大雨如注江水泛漲頃刻及街坊維

堅出署拜禱函掣鎮遠府門額投梁石以厭之水乃退 詔策論表判試天下士停止八

股 裁各學訓導每府衛設教授一員州縣大學設學正教諭一員小學訓導一員無副學 八月

黔史卷四

續報荒墾 四年銅仁火 五年裁衛經歷衛千總 秋七月

定苗民讐殺例 畢節大水 六年秋八月裁鎮遠總兵官

九月 帝親政詔裁各巡守道裁推官 停造黃冊 七年秋八月詔仍

以八股試士弛民間裹足之禁

八年罷鼓鑄

先是戶部議開鑄局貴州以銅艱費苗民惡用錢鑄無益巡

撫羅繡綿兩疏請停部議非是至是再疏迺罷

總督甘文焜至自燕甘由直撫陞任當云以甘文焜為雲貴總督此書至自燕者是時滇黔楚蜀為吳三

桂割據文焜危守貴陽故謹而書之 復舉人揀選 夏六月鎮遠屬那麽等三

十六寨來降 九年夏六月施秉縣山丙岑邦巴蜡等一十七

寨苗來降 十年詔以文焜奪情留任 十有一年凱里黨稿
苗阿福糾九股雜講高坡苗攻司營偏施戒嚴文焜遣副將王
斌勦平之 春三月鎮遠火毀民居殆盡發金三百兩賑之
畢節白蛾蔽天 十有二年裁偏橋驛丞 餘慶石花開 十
有二月吳三桂叛逆於雲南文焜奔鎮遠自殺自縊於吉祥寺
今寺中雙栢樹
下乃文焜致命處初八日未時至
偏橋酉時至鎮遠道塞遂自殺 十四年春三月遵義火
十五年夏五月晝晦 十八年貴陽大雨雹 十有九年大師
復貴州綏滇黔 破偽將韓天福於平越先是逆黨郭壯圖因
三桂死擁其孫世璠屯貴州以拒大兵至是克平之世璠遁走
雲南 先是賊將張足發吳應奇奔據鎮遠馮成蘇分據施秉
新城賊兵四出徵糧苗民大困 冬十月定遠平寇大將軍章

黔史卷四

三

秦帥師次偏橋 十有一月內閣大學士佛倫金宏等督糧駐
偏橋起武岡寶慶丁壯運楚米至黔濟軍糧廳駐柳塘堡民苗
獲蘓 二十年夏大疫 秋大饑 知府王清遠設館侍藥募
醫診治捐米賑贍 二十有一年夏六月蝗 知府設醮禳祓
乃消滅 解吳逆家口至二十有七年乃止思
石銅黎皆起夫協解 二十有二年
免徵地丁糧本年秋季至
來年春季夏 省衛入縣 二十有三年遵義大
水 二十有四年蟲入民倉食穀 知府設醮禳之乃沒知府
王清
遠也三言知府者無愧於知府也清遠以
鎮遠擢貴陽首郡隨在濟施故不係之地 二十有五年免賦
雪雹大如卵 二十有六年省偏橋衛入施秉縣 移縣治於
衛城改衛學教授為縣學訓導 畢節白蛾漫天有鳥食之
二十有七年夏五月二十一日大水橋圯蛟起黃平舊州都四

山衝溢偏礮漂沒廬舍至鎮遠祝聖礮塌巡撫田震以聞 二
十有八年春三月襄安縣高車村巨石自轉貴陽水溢 移鎮
遠縣治於河北 分設鎮遠縣學即以縣治為學宮 從巡撫王燕請也
三十二年秋七月隕霜殺稼 三十三年畢節龍見 三十
七年遵義火 四十有一年夏六月調鎮黃施官軍勦巖門革
爨逆苗羅尤等 以殺本官何贊遠也 秋九月慧星見 四十有二年冬
十有一月雷鳴 四十有三年春二月添設各學教諭 從學臣張豫章
請也 四十有七年夏五月畢節大水 五十年春二月都勻北
河巨石自移 五十六年安化火 五十有八年夏四月鎮遠
大水淹文廟偏礮圯 六十有一年春正月有年

世宗憲皇帝雍正元年春設約正 值月宣講上諭以司教化 建節孝祠 設

黔史卷四

普濟堂育嬰堂 養老慈幼 三年設社倉 秋無鹽 五年建先農

壇 置田貳畝玖分并牛隻農器等具 思南大水

夏六月勘苗疆

初黎平府知府張廣泗議勘苗疆情形苗專以劫掠為事無
能為也往往攻陷城池擄之去水旱饑饉尤甚居民被害慘
矣良有司恩威并行則四境帖然國初削平孫逆吳逆地方
豐熟垂六十年苗民亦既安堵矣茲復謗謫謀不軌者豈以
飽煖之過生災耶

六年十月巡撫張廣泗帥師討八寨生苗平之 十有二月討
丹江生苗平之 七年六月討清江生苗平之 秋八月有五
色雲 八年豁免正賦 九年討古州上下生苗平之 十年

秋九月逆苗圍抬拱命提督揚威將軍哈元生帥師討平之
十有一年夏五月大水偏礮圮
十有三年賊苗包利紅銀等大作亂

攻古州清江梗官路四月陷黃平州知州羅鳴序被殺陷舊
州城五月陷青谿縣陷餘慶縣

冬十月

太上純皇帝命湖廣總督張廣泗為經畧會楚師粵師川師滇師
討之

是役也總兵蘇大有功為最大有忠勇有膽畧攻黃茅嶺殺
苗人殆盡苗人憚之見其旗幟輒奔潰目為蘇大刀

乾隆元年春正月討平牛皮箐虜首逆苗包利枉利等誅之

黔史卷四

無禮義不足深責故書從其輕此書誅者其為害大勞師動兵故也 二十八年春晝晦 二十

九年春晦 秋恒雨 三十三年大兵伐緬立軍需局 三十

四年夏大水偏礮圮 三十五年大饑路斃無算 三十七年

大水 冬十有二月大雪積三五尺茅屋被壓 三十九年有

熊二頭往來 冬剪雞羽 民間無故雞羽剪去觸處皆然亦無休咎 四十年春旱

四十一年夏旱 四十七年夏大水 四十八年夏大水

冬十有二月十二日鎮遠橫街火延燒至二牌 四十九年夏

大水偏礮圮 五十年夏大水 冬十有一月鎮遠西關火

五十一年夏大水 五月朔六日地震歲歉 五十二年夏大

水山土崩裂 五十四年春雨雹殺禽 貴陽大饑賑於東嶽

廟饑民領賑相踐踏死三百餘人 五十六年春二月丙辰鎮

遠橫街火延燒至二牌

六十年春正月二十一日楚辰苗結銅仁紅苗大作亂

總督福康安帥師會楚師川師粵師滇師討之獲逆苗吳半生解京誅之

嘉慶元年春霖雨 夏五月乙卯康安卒於師 秋八月逆苗

石三保石柳鄧死於亂軍已而克平 九月青谿匪賊聚眾作

亂巡撫馮遠鎮遠縣知縣王懋德往招被殺提督花連布陣亡

連布甚驍勇單騎勒山路賊蜂擁至馬蹶被殺 冬十有一月總制勒保移征銅苗軍

擒首逆高承德誅之克平 二年春正月南籠狝苗大作亂總

制保帥師剿之 秋九月獲首逆七絳鬚王化朝苗女先大解

京誅之克平

黔史卷四

黔中本樸陋苦無載籍可稽自秦漢來往往曠數十年歷數代無一事可見又苗人自相讐殺地方官處置乖方輒動干戈輒言苗人叛服不常夫常不常其機在我何責於苗人又苗人與漢人訟無有直苗人者胥吏又復奸取贖金偏私之過皆可不必書故謂之裨史然不言黔裨史而直言史者何黔卽裨也郭青螺有黔記志山川風物疆域建置沿革故謂之記其事其文則史也春秋各國皆有史王者之迹熄矣有王者起各國不敢有私記載然不敢有私記載而可無記載乎無記載太史何由而采之滇黔相連壤既有滇史則亦有黔史 王酉山云事不緣其起徒言苗人反叛苗人豈欲作帝王者哉年歲荒歉遂致剽掠爲地方害患莫可言耳

漢書曰高惠文景迄孝武無書伏誅者則曰有罪下獄死或云
自殺或云斬或云伏辜景帝特詔改磔爲棄市取刑人於市與
衆棄之之意史稱幾致刑錯豈虛語哉惟昭帝上官桀桑弘羊
謀逆始書伏誅霍禹雲山及顯謀逆書誅此外無顯言者至後
世有方變亂輒書伏誅又况蠻夷古不通中國雖不可言與國
要皆外夷如交趾緬甸南詔等特以兵威強弱爲順逆耳豈可
深議也哉

黔史卷四

右猶氏心魯所撰黔史二卷余數年前得之故紙叢中丙子夏日攜之滇南謀刻未果戊子返黔熊露階司馬見之謂可備黔中事實謀付梓人而屬余書其後案猶氏名法賢字心魯別字酉樵乾隆壬午副貢生考取八旗教習後以教諭卒官其詩嘗爲洪稚存先生所稱有酉樵山房詩文集而近人顧罕知之者是可慨也黔處萬山中其人率厚重質實執堅忍以自表見者所在多有獨見聞較狹無以樸學稱者逮歛程侍郎恩澤視學於黔始以通經學古爲之倡於是承其學者如遵義鄭徵君子尹獨山莫徵君子偲遂以樸學名於時世稱西南二子及今而名益昌獨怪稚存先生以碩學鴻才先侍郎來視黔學而及門中未聞有通經學古如莫鄭諸人者豈黔中士人無從先生問業者歟抑有其人而名氏若存若滅亦如猶氏者歟此余因猶氏之詩而不能無疑者矣此書紀黔事略備與黔書續黔書黔記等并有關於黔之國聞故特詳其姓氏俾覽者有所考云時光緒戊子貴陽陳渠識

黔史陳跋

